



26. 09. 2023.

Svar við bókun heimastjórnar. Málsnúmer 202101277

Tíminn líður hratt, en þó ekki eins hratt og heimastjórn vill meina. Rétt eins og kemur fram í samningi undirrituðum af sveitarstjóra höfum við 5 ár frá undirritun afsals fyrir húsinu (þann 24. febrúar 2022) til að vinna að endurbótum, og er nú því aðeins eitt og hálft ár liðið.

Verkfræðistofan Efla var fengin til að vinna kostnaðaráætlun á sínum tíma, sem stuðst var við þegar við gerðum áætlanir okkar um framkvæmdir við húsið. Sú áætlun var unnin af bjartsýni um fjármögnun. Enn erum við að klára að tryggja allt það fjármagn sem til þarf, áður en ráðist er í framkvæmdir, stendur sú vinna yfir.

Umfang starfsemi okkar er þó nokkur og ekki sýst vegna þess að hún er margþátta. Umsamdar framkvæmdir á húsinu eru vissulega stór þáttur hennar, en ekki er hægt að líta framhjá þeirri vinnu sem hefur verið unnin þegar kemur að uppbyggingu sjálfs safnsins, dagskrárgerð og sýningarhaldi.

Nú þegar höfum við starfað í Vogshúsinu í tvö sumur, haldið þar tvær sýningar sem hafa sópað að sér gestum og vöktu mikla athygli.

Undanfari Ars Longa, sýningarröðin Rúllandi snjóbolti, stuðlaði einnig að fjölda heimsókna í bæinn en síðasta sýningin í Bræðslunni *Alheimurinn er ljóð*, einkasýning Sigurðar Guðmundssonar er nú orðin að safneign Ars Longa, sú eign gerir safnið sérstakt á heimsvísu þar sem Ars Longa er stærsta safn verka Sigurðar á heimsvísu. Frá stofnun safnsins hafa fjölmargir listamenn falið safninu verk sín til varðveislu og er það okkar skylda að búa vel að okkar safnkosti.

Vissulega mættu endurbætur vera komnar betur á skrið í Vogshúsi, en það er að mörgu að hyggja þegar reisa á heilt samtímalistasafn á Austurlandi. Við höfum gætt þess að sinna starfsemi okkar, gestum og listamönnum af kostgæfni, boðið til okkar fjölda einstaklinga sem hafa notið þess að kynnst Djúpavogi og perlum bæjarins. Mætti nefna forsetisráðherra Katrínu Jakobsdóttur sem opnaði fyrstu sýningu Ars Longa 2021, Þórarinn Eldjárn sem kom til bæjarins til að lesa upp úr nýrri ljóðabók Sigurðar *Ljóð og ljóð*, menntamálaráðherra Lilja Dögg Alfreðsdóttir sem opnaði fyrstu sýninguna í húsnæði safnsin Vogshúsinu 2022. Auk þess hafa Ólafur Ragnar Grímsson, Guðni Th. Jóhannesson og Illugi Gunnarsson þá menntamálaráðherra opnað sýningar hér á Djúpavogi.

Ars Longa dregur hina ýmsu gesti í bæinn, bæði merkisfólk jafnt sem ferðamenn, almenning og menningarvita. Það var ánægjulegt að sjá Ars Longa sem einn áfangastað sumarsins í yfirliti Heimildarinnar (hlekkur hér að neðan). Að auki höfum við gætt þess að sinna heimafólki vel, við höfum ávallt endað sumarið á því að fá til okkar grunnskólanema og hafa nemendur, kennarar og starfsfólk verið frábærir gestir. Einnig hefur skólinn fengið að nota húsnæðið fyrir eigin sýningu og börn notið góðs af leiksýningu sem heimsótti bæinn og var sett upp í Vogshúsi.

Hér hefur verið stiklað á stóru til að gefa stjórn hugmynd um þá miklu vinnu sem hefur verið sinnt undir formerkjum Ars Longa. Sú vinna hefur skilað sér í auknu menningarstarfi á milli byggða á Austurlandi og öðruvísi ferðamönnum til bæjarins, jafnt sem auknum áhuga fólks á Djúpavogi sem gaman verður að fylgja eftir. Ástand hússins hamlar auðvitað starfseminni allri og er mikið tilhlökkunarefni að koma húsinu í viðunandi horf.

Munum við upplýsa heimastjórn um framgang mála eins og þeim vindur fram.

F.h. Ars Longa,

Þór Vigfússon,

Sólhól, Djúpavogi.

Djúpavogur, áfangastaður í *Handbók mennignarvitans* í Stundinni:

<https://heimildin.is/grein/18320/ferdahandbok-mennignarvitans/>

Gagnrýni um sýningu sumarsins 2023, Margrét Elísabet Ólafsdóttir skrifar

<https://heimildin.is/grein/18511/nidur-timans-i-ars-longa/>

